

ad monumentum festinarit, in ipsis dubio procul tenebris, vel aliquantulum post, antequam Domini Resurrectio nota esset, & antequam cuiquam Dominus apparuisset. Alter vero abitus à Lucâ tunc contigisse refertur, quando de apparitionibus Angelorum, deque Resurrectione Domini coram toto cætu mulieres prædicarant, & testati erant; Vbi solum Petrum monumentum accessisse, visisque linteaminibus defacto secum mirantem abiisse legimus. Et quid obstat, quò minus Petrus bis ad monumentum cucurrerit; cum & mulieres accesserint sæpius? Probabile itaque magis est, occasione secundi abitus Petro Christum se manifestasse.

§. 12. Apparuit (4) Christus duobus in Emaus abeuntibus Luc. 24, 13. 15. & seqq. Hanc manifestationem ab eâ, quæ discipulis in agrum abeuntibus contigisse dicitur à Marco cap. 16, 12. minimè distinctam, sed unam eandemq; historiam à Marco & Lucâ descriptam esse, cum Gerhardo in Harmon. suâ cap. CCXI. rectè statuimus; id enim omnium circumstantiarum concordantia textum introsipientes docet. (5) Apparuit Discipulis unâ omnibus, Thomâ excepto, in vesperâ diei illius propter metum Judeorum congregatis Joh. 20, 19. Luc. 24, 36. Eo nempe modo, ut ingressus subito foribus clausis, nec visus advenire, repente constiterit in medio illorum. Planissimum hinc est, omninò per fores clausas corpore suo vero, sed glorificato, Christum per divinam sc. virtutem suam penetrasse. Quam in rem Richardus Mountacutus Norvicensis Episc. veritatis vi convictus, parte poster. T. prioris Orig. Eccles. p. 455. ita scribit: *Improbè detorquent scripturas illi, qui Christum pulsasse volunt, quemadmodum Petrus Act. 12. & apertis foribus introiisse. Improbè alii, qui Christum aperuisse illos per potentiam divinitatis suæ volunt, quemadmodum cit. l. fores civitatis ferrea Petro & Angelo adaperiebantur. Improbè, qui sponte patuisse volunt: qui per fenestram aut aliter introiisse, non minus, quam Maldonatus ridiculè, qui Petrum & Angelum clausas carceris fores penetrasse opinatur, eoq; non legitur spontè patuisse. Ingressus est Christus clausis foribus: stetit in medio: subito adventu notus, non tantum eo tempore ingressus, quo claudebantur fores: hoc est, de nocte, sed*

*Quomodo
foribus
clausis
Christus
apparue-
rit?*